

AUGLÝSING

um aukaleik Íslenskra getrauna.

Ráðuneytið hefur í dag samþykkt samkvæmt 3. tl. 4. gr. og 36. gr. reglugerðar fyrir Íslenskar getraunir nr. 543/1995, að Íslenskar getraunir efni til tímabundins aukaleiks sem nefnist Eurogoals og starfræktur er í samvinnu við Dansk Tipstjeneste í Danmörku og Aktiebolaget Svenska Spel í Svíþjóð.

Samþykkt er að leikur þessi verði starfræktur til 30. apríl 1999.

Um leik þennan gilda reglur þær sem fylgja hér með sem fylgiskjal I.

Dóms- og kirkjumálaráðuneytinu, 24. september 1998.

F. h. r.
Jón Thors.

Fanney Óskarsdóttir.

Fylgiskjal I.

Spilareglur fyrir Eurogoals.

1. Aðildarfélögin.

- 1.1 Eurogoals er getraunaleikur sem norrænu getraunafélögin Dansk Tipstjeneste (Danmörk), Íslenskar getraunir (Ísland) og Aktiebolaget Svenska Spel (Svíþjóð), hér á eftir nefnd félögin, standa sameiginlega fyrir. Í leiknum er giskað á úrslit ákveðinna leikja sem félögin velja á ákveðnu tímabili (getraunaumferð).
- 1.2 Hæsti vinningur getraunarinnar er sameiginlegur hjá félögunum. Af hverri seldri röð fer jafn há upphæð í fyrsta vinningsflokk sama hvert félaganna tekur við henni. Allir þeir sem fá fyrsta vinning fá jafn stóran hluta af vinningsupphæðinni.

2. Getraunaformið o.fl.

- 2.1 Í Eurogoals getrauninni á þátttakandinn að giska á hvort liðin í sex leikjum geri hvert um sig ekkert mark (0), eitt mark (1), tvö mörk (2) eða fleiri en tvö mörk (M) á þeim leiktíma, sem ágiskunin tekur til.
- 2.2 Sé annað ekki tekið fram er leiktíminn báðir hálfleikir venjulegs leiktíma en getur einnig verið hluti leiks, t.d. annar hálfleikurinn. Með hugtökunum leikur og leiktími er í reglum þessum átt við þann hluta leiksins sem getraunin miðast við.
- 2.3 Ef annað er ekki tekið fram verður Eurogoals getraunin haldin vikulega frá september og fram fjórðu viku í apríl (getraunatímabilið). Leikdagar eru venjulega miðvikudagar og fimmtudagar.
- 2.4 Leik í Eurogoals verður að vera lokið á ákveðnum tíma til að úrslitin gildi í getrauninni. Sé annað ekki tekið fram er getraunaumferðin frá klukkan 18 CET (mið-Evróputími) fyrsta leyfilega leikdag og til klukkan 24 CET síðasta leyfilega leikdag. Við leikjalistan á leikskrá sem félagið gefur út vikulega, er tekið fram hvaða dagar eru leyfilegir leikdagar.
- 2.5 Ef munur er á leikjalistanum hér á landi og leikjalistanum sem félögin hafa komið sér saman um, þá gildir sameiginlegur leikjalisti félaganna.
- 2.6 Þátttaka í getrauninni getur annaðhvort verið í formi einfaldra raða eða kerfa. Það síðarnefnda er aðferð þar sem mörgum röðum er skilað inn með styttri útfyllingu eins og hér segir: Hver ágiskun í kerfi er sjálfstæð eining (röð).

3. Þátttökuform, vinningar og ógildingar.

- 3.1 Verð getraunaraðar er 10 kr.
- 3.2 Einstaklingar spila Eurogoals á Internetinu og er þátttaka greidd með greiðslukorti. Vinningar eru þá eingöngu færðir á sama greiðslukort og greiddi fyrir þátttöku.
- 3.3 Íþrótta- og ungmennafélög sem hafa umboð frá Íslenskum getraunum geta selt Eurogoals til þátttakenda með sérstöku söluforriti á Internetinu. Greiðsla fer þá fram með greiðslukorti þátttakenda eða greiðslukorti umboðsaðila. Vinningar eru þá annaðhvort færðir á greiðslukortið sem greiddi fyrir þátttökuna eða þátttakandi gefur upp númer á bankareikningi, og eru þá vinningar færðir inn á viðkomandi bankareikning.
- 3.4 Þátttakendur eru ábyrgir fyrir því að gefa upp réttan bankareikning, enda komi þær upplýsingar greinilega í ljós á kvittun.
- 3.5 Vinningar eru að jafnaði greiddir út daginn eftir að seinasta leik ágiskunar lýkur (getraunaumferð). Ef vafi kemur upp um fjölda vinningshafa, þá hafa Íslenskar getraunir rétt til að fresta vinningsútborgun 1. vinnings þar til kærufrestur er útrunninn skv. 42. gr. reglugerðar.
- 3.6 Aðeins er hægt að skila inn þátttöku þegar móðurtölvan er opin.
- 3.7 Allar þátttökukvittanir eru geymdar miðlægt í móðurtölvunni en þátttakendur og umboð geta prentað út kvittun. Ef mismunur er á þátttökukvittun í móðurtölvu og prentaðri kvittun, þá gildir sú í móðurtölvunni. Á þátttökukvittuninni er öryggisnúmer sem er sérstakt fyrir hverja kvittun.
- 3.8 Raðir eru aðeins gildar í því formi og í því umfangi sem skráð er í móðurtölvu skv. 11. gr. reglugerðar um Íslenskar getraunir nr. 543 frá 1995.
- 3.9 Vilji þátttakandi afturkalla ágiskun sína sem hann keypti hjá umboði verður hann að gera það hjá sama umboði og hann skilaði henni inn til sama dag. Aldrei er þó hægt að afturkalla ágiskun eftir að 5 mínútur eru liðnar frá því að félagið lokaði móðurtölvunni fyrir móttöku ágiskana í viðkomandi umferð.
- 3.10 Þátttakandi ber ábyrgð á að þátttökukvittunin eigi við um rétta umferð, fjöldi þeirra sé réttur og sé í samræmi við þær ágiskanir sem hann óskaði eftir.
- 3.11 Hvorki félagið né umboð eru skaðabótaskyld vegna tjóns sem þátttakandi verður fyrir vegna þess að félagið eða umboð vöktu ekki athygli hans á skyssu sem hann gerði í sambandi við ágiskunina.

4. Hvernig úrslit leikja eru fengin.

- 4.1 Leik sem er á getraunaseðlinum og lýkur áður en getraunaumferðinni lýkur telst hafa lokið með þeim úrslitum sem fyrir lágu við lok venjulegs leiktíma. Tími sem dómari kann að bæta við vegna tafa telst til venjulegs leiktíma. Úrslit sem fást eftir framlengingu eða kæru gilda ekki.
- 4.2 Ef leikur í getraunaumferðinni er stöðvaður áður en venjulegum leiktíma lýkur og það knattspyrnusamband e.þ.h., sem sér um skipulag lýsir honum lokið, gilda þau úrslit sem fyrir lágu þegar honum lauk. Með loknum leik er hér átt við leik, sem ekki á að leika til enda eða leika aftur síðar. Hafi engin tilkynning borist um hvort leik sé lokið eða ekki frá því knattspyrnusambandi e.þ.h. sem skipulagði leikinn í síðasta lagi á miðnætti síðasta dags getraunaumferðarinnar telst leiknum ólokið.
- 4.3 Ef leik er ekki lokið áður en getraunaumferðinni lýkur eða leikur er stöðvaður áður en leiktíma lýkur samkvæmt því sem segir í grein 4.2, fást úrslitin með sérstöku hlutkesti. Þetta gildir einnig um leiki þar sem annað liðið vinnur vegna þess að hitt liðið mætir ekki til leiks. Ef sérstök ástæða er að öðru leyti til þess að víkja frá úrslitum leiks geta félögin ákveðið að hlutkesti skuli gilda.
- 4.4 Ágiskun telst vera rétt því aðeins að rétt sé giskað á markafjölda beggja liða í leiknum.

5. Útreikningur vinningsupphæða.

- 5.1 Af heildarþátttökugjöldum fyrir Eurogoals á Íslandi fara a.m.k. 40% í vinninga.
- 5.2 Í Eurogoals eru þrjú vinningsflokkar.
- 5.3 Í fyrsta vinningsflokknum eru raðir með sex leiki rétt ágiskaða, í öðrum vinningsflokknum raðir með fimm leiki rétta og í þriðja vinningsflokknum raðir með fjóra leiki rétta.
- 5.4 Fyrsti vinningsflokkurinn er sameiginlegur fyrir aðildarfélögin. Af hverri seldri röð, óháð því hjá hverju aðildarfélaganna hún er seld, fara 0,03 ECU í fyrsta vinningsflokk.
- 5.5 Aðrir vinningsflokkar eru bundnir við einstök lönd.
- 5.6 Þegar búið er að leggja í fyrsta vinningsflokkinn samkvæmt grein 5.4 skiptist upphæðin sem eftir er á milli innlendu vinningsflokka þannig að 70% fara í annan vinningsflokk og 30% í þriðja vinningsflokk. Við gengisútreikninga skal nota gengisskráningu daginn eftir getraunaumferðina skv 5.9.
- 5.7 Vinningur fyrir röð í fyrsta vinningsflokki er sama sem vinningsupphæðin deilt með fjölda allra réttra raða hjá öllum aðildarfélögunum.
- 5.8 Vinningur fyrir röð í innlendu vinningsflokkunum er sama sem vinningsupphæðin deilt með fjölda réttra raða í viðkomandi vinningsflokki.
- 5.9 Endanlegar vinningsupphæðir eru að jafnaði staðfestar af eftirlitsmanni dómsmálaráðuneytis í síðasta lagi daginn eftir getraunaumferðina. Félagið hefur þó leyfi til að fresta útborgun 1. vinnings skv. 3.5.
- 5.10 Vinningsupphæðin í fyrsta vinningsflokki er staðfest af aðildarfélögunum sameiginlega. Félagið staðfestir vinningsupphæðir innlendu vinningsflokka skv. 5.9.
- 5.11 Um innlendu vinningsflokka gildir að vinningur á röð í lægri vinningsflokki má ekki vera hærri en vinningur á röð í hærri vinningsflokki. Umframupphæðin skiptist jafnt á milli raðanna í viðkomandi vinningsflokkum.
- 5.12 Ef engin röð er með alla rétta hjá aðildarfélögunum fellur vinningur niður og vinningsupphæðin bætist við fyrsta vinningsflokk í næstu umferð á eftir á getraunátímabilinu.
- 5.13 Ef engin röð er með alla rétta hjá aðildarfélögunum í síðustu umferð getraunátímabilsins er hluta félagsins í sameiginlega vinningsflokknum skipt jafnt á milli innlendu vinningsflokka.
- 5.14 Ef engin vinningsröð finnst hérlendis í öðrum vinningsflokki þá flyst vinningsupphæðin á annan vinningsflokk næstu umferðar. Í seinustu umferð getraunátímabilsins hliðrast vinningsflokkar niður á við þ.e. ef engin röð kemur fram með 5 rétta þá flyst annar vinningsflokkur á 4 rétta, þriðji vinningsflokkur flyst á 3 rétta o.s.frv.
- 5.15 Áður en vinningur er útborgaður er vinningsupphæðin jöfnuð í næsta heila tug krónutölu niður á við.
- 5.16 Félagið sér um að birta endanlegar vinningsupphæðir á Internetinu.

6. Kæror vegna vangreiddra vinninga.

- 6.1 Þátttakandi, sem telur sig ekki hafa fengið réttmætan vinning eða ranga vinningsupphæð getur borið fram skriflega kæru til félagsins.
- 6.2 Kæra skal hafa borist skrifstofu félagsins innan fjögurra vikna frá viðkomandi getraunaumferð, sbr. 42. gr. reglugerðar fyrir Íslenskar getraunir nr. 543/1995.
- 6.3 Kæru sem berst eftir að kærufrestur er liðinn eða nauðsynlegar upplýsingar vantar til að hægt sé að finna ágiskunina, verður hafnað.
- 6.4 Að öðru leyti skal fara með kæror í samræmi við ákvæði reglugerðar nr. 543/1995.
- 6.5 Rísi ágreiningur um túlkun á reglum þessum skal miða við samning um Eurogoals milli aðildafélaganna og reglugerð fyrir Íslenskar getraunir nr. 543/1995.